

# VILIPIIYA

## Warage o Ayeedek Pól Ol O Abaak Vilipiya

**1** <sup>1</sup> Aneet Pól kibeen Timozi o keegina gabara o Yesu Kiristo kayeedekun warage nico igeet dook ol o Joowo o oromtozeyu Yesu Kiristo o abaaku Vilipiya kibeena alaata ol o tuwento been tiritok ugeec. <sup>2</sup> Abon bai anyun Jooi ween baatina been Manyi onai Yesu Kiristo deten been ganon.

<sup>3</sup> Goon tup noko ma kabaabanun igeet, kanyi Jook zany naatunoon oroot. <sup>4</sup> Kajinekun goon Jook talniinta tup naati kanaryine. <sup>5</sup> Katal Jook, eeci atiritan niiga aneet liqliqonte o uuwayi o kaviyak o Joowo, akanai iitene baal agamanu e zee been inoko o. <sup>6</sup> Kaga zin naana Jooi o akata liqliqon o abon zinzeetine ugooc naan atiritun niini igeet zee ma arumnyun iiten ci abadaan Yesu Kiristo katin e. <sup>7</sup> Goon tup noko kabaabanun naana igeet zinize cano. Agano zin naatan naati kabaabanun igeet noko, eeci oromtozeyan niiga aneet detene o liqliqon o anyan Jooi. Yo nuun een inoko naati kacabine o, karabon een naati alaj kacabine, atiritan niiga aneet ka koroi kaviyak o Joowo. <sup>8</sup> Aga Jooi naana kaduwa didi giye ci kanekun ne, Kareezun igeet dook oroot o, eeci didi kareezun naana igeet zinize onan dook kiyo areezun Kiristo o.

<sup>9</sup> Kajinekun zin goon naana igeet Jook o ka kazaace reezonet unoon tup kidikir, ka buk kazaace gawiin unoon agayu Jook kidikir. <sup>10</sup> Ka zin agaac niiga iinya dook kaal o abon. Ma agoonu noko, atiritun gi nico igeet obonta hume o Joowo zee been iiten ci abadaan Yesu Kiristo katin e. <sup>11</sup> Enice ka zin ibitit niiga bonat ween didi o aku naatan Yesu Kiristo doon. Ma zoz nico anyaa Jook naatinet been dihqon.

### Uuwayi o zoz o akati Yesu Kiristo adinqin oroot

<sup>12</sup> Dol o yaai tuwento, inoko karoonyun naana igeet agaac kaal o gerze agoononekan aneet dook bar itiritit kaviyak o Joowo abon kazaantozek looc. <sup>13</sup> Inoko takirnya o abek ol o acabje kibeena buk ol dook naato agaac niigi kacabje naana o, eeci keen gabaren ci Yesu Kiristo. Alaj kacabje giye ci kagoone gi ci ger. <sup>14</sup> Mazin cabiin cane o bar idiziyek ol ci meel ole o tuwento kiziti moote kuuwayit zoz o Joowo kokom holiin.

<sup>15</sup> Hedet kaga naana ol nico ogen naatineen uuwak gole ci ger, eeci olla amadikan niigi aneet, ma aron gól ci ka kujuktan niigi aneet. Maje ol ogen naatineen uuwak zoz o Kiristo zinzeetine ci abon. <sup>16</sup> Ol nicigi uuwak zoz o Joowo o, eeci areezan niigi aneet, ma aga niigi kacabje naana giye o koorine kaviyak o Joowo. <sup>17</sup> Bar zin ol ci amadikan aneet o alinqin niigi gi ci akati eleeti ugeec, ma aron gól ci ka kanyaaktakan niigi aneet baabani ci ger iinyaye ci kaave cabiinta o.

<sup>18</sup> Bar zin naatan nico gi ci labak! Olla naana karoony gól ci uuwayin zoz o Kiristo. Ma gi nico anyaa aneet talniin oroot ele. Yo nuun te uuwak niigi zoz o Kiristo zinzeetine ci ger, karabon een zinzeetine ci abon, katalne naana labak. <sup>19</sup> Eeci kaga naana haryiin unoon kibeena tirten o aku Vojize o Yesu Kiristo naan anyan aneet koojai. <sup>20</sup> Gi can karoony oroot neen ce. Alaj naana karoony kiita liqliqonte o anyan Jooi kilinqin. Bar karoony kanyak moozet tup, ricik oroot naati kacabine noko ka kanyaak Yesu Kiristo dihqon alye can o kaale o kagoon dook, yo nuun te karugi, karabon kadaai. <sup>21</sup> Mayo roget gitaz? Naatan roget neen liqliqoni o kalinqoneke Yesu Kiristo ween Manyi onan. Mazi kadaai giye ci akati noko, bar abon oroot, eeci kavó naaga tammu tadena, ma kavó kajowa talniin o roget o abil been neen. <sup>22</sup> Alaj zin naana kaga roget ki daayiz kejera naatineen jan, mate naan karugi, ma anyaa rogeti cane o Kiristo liqliqon ci abon loota njina. <sup>23</sup> Inoko kaner zó. Karoony koton roget ci loocu kanye noko, ka kook koromtewa been Kiristo tammu tadena. Ma nico naatan gi ci waan abon oroot neen. <sup>24</sup> Bar zin giye ci akanun igeet, maya rak karugi. <sup>25</sup> Zin giye nico kaga naana naan karugi rak tijeere, ma karome kibeena igeet dook ka kitiritun igeet dook kazaaceyun talniin tuwente unoon kizi maka. <sup>26</sup> Ka zin atanaaz niiga Yesu Kiristo naatan aneet iiten ci kakunakun naana igeet bodo.

<sup>27</sup> Gi ci zin adinqin oroot neen baayizi ci abaaku niiga baayiz o aduyai kaviyawe o Kiristo. Mayo nuun te kakunakun naanala igeet ka kicinun, karabon alaj kakunakun, abon kaziinqun naana igeet adowinun zinzeeti ki baabani, ma aruweku zó looc tuwenta odoyit gole o kaviyak o Joowo.

<sup>28</sup> Má anqolinu ol o amarninun igeet, bar anyayit moozet tup noko. Má amenanu agoonu noko, ayelzak koca gi nico noko targanyin uneen atarganyin katin. Maje niiga bar katin eelyanu, eeci Jook neen o katin eelanun igeet. <sup>29</sup> Eeci okolayun niini igeet gól ci atuyu Yesu Kiristo. Alaj zin bar buk een gi nico doon, bar buk okolayun niini igeet gól ci alinqoneku niiga noko, ma apirnanu naatin. <sup>30</sup> Inoko zin kooritnón naaga dook liqliqonte nico. Nici liqliqon baal goon aziiknu kapirrane naana e neen. Ma inoko naan kamena noko kiyo goon aziiknu o.

### Ecelbezanit eleeti ka odoye

**2** <sup>1</sup> Inoko baayizi unoon naatan Yesu Kiristo alaj anyun dooyiz? Inoko reezinet o Kiristo alaj anyun talniin? Inoko niiga dook alaj anyaku Vojiz o Joowo? Inoko goon alaj awucnekun igeet ol ci apirna naatunoon? <sup>2</sup> Karoonyun zin naana igeet anyayit baabaninet ci adoye ki reezonet ci adoye ki zinzeeti ci adoye. Má agoonu kaal nicoko, abiz buk koca aneet zinize cane o ki talniin. <sup>3</sup> Má anyeku eet oma naatunoon kutugu kaal ci akati ele cin doon, bar abon ecelbezan eeti ele calaj anyek niini ele kizi titiny gonogine ogen. <sup>4</sup> Má atiritu eleeti ugooc doon, bar egelemit gól ci atiritu niiga ol oogi buk.

### Ayayizit Yesu

<sup>5</sup> Abon niiga anyaku baabani ci atobo been baabani o Yesu Kiristo. <sup>6</sup> Mayo nuun atobo niini been Jook, ma anyak dooyiz o Joowo ele o, alaj aron kirican dooyiz nico oroot. <sup>7</sup> Bar otón tobónet o atobone niini ki Jook, ma anyek ele kizi gabaren. Agoon niini ele kibil kiyo eeti o deer o. <sup>8</sup> Acelbezan niini ele, ma awó gole ci aziinqi Jook zee makacin ook daayize onin baal apirrane oroot keete ween talakec e. <sup>9</sup> Giye nico doona Jooi noko loota ooyi tammu tadena, ma akanek noko zaar ci adinqin oroot kujuk zaar dook. <sup>10</sup> Ka zin kaala dook o abaak tammu tadena kibeena o abaak loota dook been o abaak tóowai eecito dook kakati kozoniti looc hume onin naati adinqinani niigi zaar ogin. <sup>11</sup> Ma abora ol dook aatine ugeec gi ci azi ne, “Yesu Kiristo Manyi neen.” Ma gi nico anyek Jook ween baatina zany oroot.

## Ataranit looc kiyo monyonya o

<sup>12</sup> Laŋotigan o kareezuŋ, karoonyuŋ iziiktaŋ ɔɔt ɲaati kadewɔn noko kujuk bar baal goon aziiknaŋ niiga aneet tup iinyaye baal karomen kibeen igeet e. Abon goon aliŋliŋa eeti ce ɲaatonooŋ roget ci ele onin niini alya. Utuguz gi nico ɲaati adiŋɲanu Jook ɲoliinta. <sup>13</sup> Eeci Jooi aliŋliŋ niini tup noko zinzeetine ugooc, ka kanyuŋ igeet doyiz ci aziiŋnu kaal o aroonyekuŋ niini igeet utuguz, ma animnyu iziiyt nɔɔnɔ.

<sup>14</sup> Iliŋliŋit kaal dook kɔkɔm cocobɔn been daŋɔn. <sup>15</sup> Ka zin anyayit niiga zinzeeti ci vɔɔr, ma abaaku been ɔl kɔkɔm gi ci ger eo ɔl o Joowo. Mayo nuun abaawonu ki ɔl ci loocu ger een libjok noko, abon ataranu niiga nɔɔgo kɔrgena kiyo monyonya o tammu tadena goon ataran looc o ɲaati uuwaweku niiga nɔɔgo zɔɔz o rogeto. <sup>16</sup> Mā agoonu noko, kanaati koca naana Jook ɲaatonooŋ ɔɔt iitene ci abadaan Kiristo e, eeci kaga koca naana alaŋ adakan zɔɔ tuu demziinte onan kademezuy igeet.

<sup>17</sup> Mayo nuun mā kadaai naana giye ci akati tuwen unooŋ, katalne naana labak, ma kazɔl talniin can o ki igeet dook. <sup>18</sup> Buk niiga abon atalninu ka kozolit talniin cunooŋ o naaga dook.

## Kitoonekuŋ Timozi ween ɲeeran tuwenta

<sup>19</sup> Inoko zin karooy naana zaare o Manyi Yesu kitooneyuŋ Timozi kataman, eeci karooy kiziik kaviyak cugooc ka katalɔ aneet ziniz. <sup>20</sup> Akom eet oma ci abil kiyo Timozi o. Areezuŋ didi niini igeet ɔɔt, ma arɔɔŋ kook kitirituŋ. <sup>21</sup> ɔl ogen aliŋliŋ kaal ci eleeti cigeec doon, alaŋ een kaal ci akati Yesu Kiristo. <sup>22</sup> Agayu ri niiga bonat o Timozi. Kaliŋliŋnya goon naana ki nɔɔnɔ kiyo logoti o aliŋliŋ kibeen baatin o ɲaati kuwaka kaviyak o Joowo. <sup>23</sup> Karooy zin kitooneyuŋ nɔɔnɔ igeet kataman iiten ci te akatai rooni onane, ma kagaweya goɔl ci kagawei. <sup>24</sup> Kaga zin naana zaare o Manyi ɲaan kakunakuŋ igeet naana alya taman.

## ɲaan kitoonekuŋ Eparoditus

<sup>25</sup> Kabaaban abon kitoonekuŋ igeet Eparoditus ween goɔna tuwenta baal itoonakaŋ aneet ka kiiya kitiritan e. Korkorya goon naana been nɔɔnɔ ɲaati kuwaka kaviyak o Joowo. <sup>26</sup> Arɔɔŋ zin inoko niini kook ɲaatonooŋ ɔɔt ele ka kook kicinuy igeet. Alaŋ niini atalne, eeci aga atiranyuŋ igeet zinzeeti giye o aziiŋnu niiga nɔɔnɔ amɔɔr. <sup>27</sup> Amɔɔr zin didi iiten baale ɔɔt koŋkoŋɔ daayiz. Bar zin uwucewun niini Jook, makacin utuŋun Jooi nɔɔnɔ korok. Alaŋ zin awucnek Jook niini doon, bar kawucnei Jook naana buk, eeci mā adaai niini, kakati koca naana culum ɔɔt. <sup>28</sup> Karooy zin naana kitooneyuŋ nɔɔnɔ igeet taman, ka ma avɔ acinu niiga nɔɔnɔ bodo ka atalɔ ɔɔt, ka buk culum cane o kɔbɔwe. <sup>29</sup> Atalta zin niiga nɔɔnɔ zaare o Manyi reezinte o zinzeeti ugooc dook, eeci ɔl ci eel kiyo niini noko abon katitiny nɔɔgo ɔɔt. <sup>30</sup> Eeci iiten baale ɔŋkoŋɔ niini daayiz giye ci akati liŋliŋon o Kiristo, ma atiritan niini aneet kaale calaŋ niiga animnyu atiritan giye o eeginu reene.

## Bonat ween didi tuwenta o katuwi Yesu

**3** <sup>1</sup> Gɔɔnɔga, abon atalninu ɔɔt ɲaati Manyi. Inoko bodo kabadai kaal baal rak kayeedekuŋ e ele, eeci nici kaal o ka kuzuutuŋ igeet neen. <sup>2</sup> Egenyit ole o ger atobɔ been orze, ɔl o goon arican teedinet ci alyo. <sup>3</sup> Kaduwakuŋ gi nico o, eeci kanyayit naaga teedinet ween didi giye o kadiŋɲani naaga Jook ɲaaten Vɔŋiz onin, ma kajowa naaga titinyɔn o akunaket ageet ɲaati Yesu Kiristo. Alaŋ akunaket titinyɔnti giye ci keerane ci kateedi eleeti eci bitaalu. <sup>4</sup> Mate waan kɔrɔɔŋ karek tuwen onan kaal ci keerane ci ɔl o Juz eecitɔ kariwan labak. Bar zin alaŋ karooy, eeci baale keen alaan ci ɔl o Juz, ma kazoone keerane ugeec. Kaga naana keerane o ɔl o Juz ɔɔt kujuk ɔl o arican keerane o Juz dook. <sup>5</sup> Baaba kibeen yaai ɔl o Juz ele. Niigi bor ci ɔl o kazi Benjimen. Keen naana biye o ɔl o Juz ele rɔp. Ateedan baale ɔl aneeta ɲaati kidicaye iinya torgerem kiyo goon ɔl o Juz dook o. Ma kazoone keerane o ɔl Juz dook juruŋ. <sup>6</sup> Kagidi goon baale naana ɔl o atu Yesu, ma kagoon kaal o arɔɔŋ lotinowo o Juz dook kɔkɔm gi ci kabaci. Mā da kizi gi ci anyet lotinowa o Juz kobonta, kobona koca naana ɔɔt. <sup>7</sup> Bar zin inoko o giye ci akati Kiristo, kaal baal kagoon naana baal kizik abon ɲaatan e dook, kagawa inoko bar da kaal ci labak, alaŋ atiritan. <sup>8</sup> Alaŋ zin bar buk een kaal niceke doon, bar buk kanyeya kaal o loocu dook kizi kaal ci labak giye o karɔɔŋe naana gi o abon ɔɔt. Titiny ɔɔt kujuk kaal niceke dook gawiin o kagawe naana Yesu Kiristo ween Manyi onan. Giye ci akati nɔɔnɔ kujukeya kaal niceke dook tuu. Kanyeya nɔɔgo dook kizi kaal ci ger een ririny, ka kojowa naana goɔl o Kiristo. <sup>9</sup> Ka zin buk kanyak naana ɲintan ɲaatin. Alaŋ karooy bodo naana kobona doyiz ci ele can o doon giye ci kazoone lotinok o Juz, eeci naana inoko kaga kanyawa bonat ween didi ɲume o Joowo giye o kutuwe Yesu. <sup>10</sup> Gi ci adiŋɲiŋ ɲaatan ɔɔt neen gawiin o kagawe Yesu been doyiz o iŋaani niini daayiza, ma karooy buk kazɔlta kibeen nɔɔnɔ piryakzet onin. Ka buk kanyak naana titinyɔn daayiza kiyo buk baale niini e. <sup>11</sup> Eeci karooy ka kitiŋayan Jooi daayiza ka kook rogete o abil been neen.

## Kivirtek roget

<sup>12</sup> Alaŋ katarkadi gi ci kazi ne, Kabona naana ɲume o Joowo. Akom. Bar olla ɲaan kamena koornoy karooy bonat baal laadun arezekan Kiristo aneet e. <sup>13</sup> Laŋotigan o kareezuŋ, alaŋ ri naana kazi ne, Kobona ɲume o Joowo. Bar olla kanekuŋ ne, Erekteyan kaala baal gerze kagoon baale e, ma inoko kɔrɔɔŋa ɔɔt kemeda kutugu kaal o arezekan Jooi aneet kutugu. <sup>14</sup> Inoko zin naana kari ɔɔ ɲin o abilni gi o karooy doon, ka kook kojowa dizken o awekan Jooi aneet ɲaaten Yesu Kiristo tammu tadena.

<sup>15</sup> Abon naaga dook o kodoyit tuwenta kanyak baabani nico. Bar mate anyak ɲaatonooŋ ɔl ci anyak baabaninok ci aŋɔrɔwɔ been nico, ɲaan ayelek Jooi nɔɔgo goɔl nico juruŋ. <sup>16</sup> Bar zin abon kamena naaga gole nico noko.

<sup>17</sup> Laŋotigan o kareezuŋ, emeda ayayiztaŋ aneet baayize onan. Ataŋaamtek buk ɔl o ayayizet ageeta baayize o acinu niiga ɲaatinaaŋ. <sup>18</sup> Kuduwayuŋ rak baale igeet gi nico lak ci meelik ger. Inoko bodo kaduwakuŋ ɲaati kaluwe kanyaye tilalɔ keberen. Anyak ɲaatonooŋ ɔl ci meel ayelza baayize uneey gi ci amarnin niigi daayiz o Kiristo keete ween talakec. <sup>19</sup> ɲaan zin katin atarganyani niigi, eeci atitiny niigi dayiin doon anyek kizi Jook cineey, ma adɔŋ eleeti kaale o ger o waan abon anyayi alyaan, ma abaaban niigi zinzeetine ugeec kaal ci loocu ger noko doon. <sup>20</sup> Maje ageet abilna baayizi onai tammu tadena. Ma kareyi naaga ɔɔt kabek goɔl o akuni ruguzoiti ona ween Manyi Yesu Kiristo o ka kiiya tammu tadena. <sup>21</sup> ɲaan zin tiŋeere aku abali niini doyiz onin eleeti cigaac ger alaŋ anyak doyiz noko, ma anyek kotobɔ ki ele onin alaŋ adaai, ma anyek kaal dook doyiz onin kiziiyt nɔɔnɔ doon.

### Utuguz kaal o edemeztu ŋaatan

**4**<sup>1</sup> Gɔtɔnɔga o kareezuŋ, karoŋ gɔn naana koromte ki igeet nɔkɔ, eeci gɔn anyan niiga aneet talniin ci kɔbɔlɔle ŋaatunooŋ ɔɔt. Abon zin aruweku zɔ looc odoyit nɔkɔ baayize unooŋ ŋaaten Manyi Yesu Kiristo.

<sup>2</sup> Inoko kilalekuŋ igeet ŋaai ween ram kazi Odiya been Sintica otɔŋit daŋon. Oromte iziti ŋoonen ŋaaten Manyi Yesu Kiristo.

<sup>3</sup> Kilalekin buk ineet laŋo ween didi ka tirit niina ŋaai nicoko, eeci gɔn baale niigi kibeen Kelemet been buk ɔl oogi ci gɔn kaliŋliŋnya been nɔɔɔ, atiritan niigi aneet ɔɔt ŋaati kuuwaye kaviyak o Joowo. Eteyeede zin inoko nɔɔɔ zaara ugeec waragewe o rogeto.

<sup>4</sup> Inoko zin karoŋnyuŋ igeet dook, ataltɔ tup nɔkɔ baayize unooŋ ŋaati Manyi Yesu. Kabedeke gi nico bodo kanekuŋ ne, Ataltɔ.

<sup>5</sup> Eyeliztak zinzeeti bonat ɔl dook. Izi ŋinti ka kiiyai Manyi aŋon. <sup>6</sup> Má anyaku ŋoliin kaale dook been neen, bar mā anyak gi ci aroŋnyu, ijinit Jook ŋaryiinta tup. Ijinit Jook zinzeetine ugooc ŋaati anyeku nɔnɔ zany kaale dook. <sup>7</sup> ŋaan Jooi o anyak ganon ci adikir ɔɔt azooni zinzeeti ugooc been baabaninet unooŋ kaavtiyɔ yaak giye o aromenu niiga ki Yesu Kiristo.

<sup>8</sup> Laŋotigan o kareezuŋ, Inoko zin karoŋnyuŋ naana igeet ibitizit ooti ugoocok baabaninte ci abon anyak leeminet, ki baabaninte ci anyak titinyon dook, ki baabaninte ci abil top, ki baabaninte ci akati vooritin, ki baabaninte ci atalna ɔl, ki baabaninte ci anyak eezet. Abaabanit kaal ci eel nɔkɔ doon. <sup>9</sup> Má anyeku kibiirtuŋ ooti. Utuguz kaal baal iziiktu ŋaatan, ma icintu kagoon, ma kademzekuŋ, ma agamtawu niiga ŋaatan e. Mā agoonu nɔkɔ, azuunuŋ koca Jooi o ganonto igeet.

### Katalne kaale o itoonakan

<sup>10</sup> Inoko katalne naana ɔɔt ele ŋaati Manyi Yesu giye o bodo inoko aadayaŋu niiga aneet ka itiritan eonooŋ laadun. Iiten baale rak amalanŋu niiga ŋinti wun ci alaŋaan atiritan aneet, eeci akomnuŋ waŋi ci ka itiritanŋu. <sup>11</sup> Alaŋ kaduwakuŋ gi nico giye ci karɔɔŋe bodo naana kaal oogi. Akom, eeci kedemeza gɔl ci kaleenona naana kibeen kaal o kanyei. <sup>12</sup> Kaga naana gɔl ci kabaaye iinyaye ci kamaane ɔɔt kibeen gɔl ci kabaaye iinyaye ci kanyerne, ma kagawa baayiz ci golok nicoko dook. Olla ŋinti kakɔye naana o iinya dook, kaleenona kibeen kaal ci te kanyei o. Yo nuun kanyer, karabɔŋ adakan magiz, karabɔŋ kanyei kaal ci meele, karabɔŋ een ci miliny, kaleenona kibeen aneet labak. <sup>13</sup> Kanim naana kutugu kaal dook labak ŋaaten Yesu o anyan aneet dɔyiz.

<sup>14</sup> Bar zin buk tirten cunooŋ atiritan aneet iinyaye ci kapirnanɔ noko, abon ɔɔt. <sup>15</sup> Baale ɔɔwa iitene baal kakanane uuwawi o kaviyak o Joowo, ma kiŋaane looce unooŋ kazi Masidoniya e, akom waanice ɔl oogi ole o tuwento ci atiritan aneet kaale ci anyan, bar igeeta doon baal atiritan aneet e. Agayu ri buk zɔz nico niiga alya ɔl o Vilipiya. <sup>16</sup> Buk baale iŋaan kaave Tesalonika e, itoonakan waanice niiga aneet kaal o karoŋ lak ci meelik ger. <sup>17</sup> Alaŋ zin bar titiny ɔɔt kaala ci anyan niiga aneet o doon, bar titiny ŋaatan ɔɔt mayuwenet o amayukuŋ igeet Jooi tirtente unooŋ. <sup>18</sup> Inoko zin urumnyan Eparoditus kaal baal itoonakan e dook, ma inoko kanyawa kaal ci meelik ger kɔkɔm gi ci kamaati kaale o karoŋ rogete onan. Eel zin kaala nici kiyo kaala o gɔn amade ɔɔt kanyek Jook ka katalɔi niini ɔɔt o. <sup>19</sup> ŋaan zin buk anyuŋ Manyi onane igeet dɔyize onin kaal dook o aroŋnyu niiga rogete unooŋ irkente onin ŋaaten Yesu Kiristo. <sup>20</sup> Kanycek Jook ween baatina zany nɔkɔ kodot. Nɔnɔ neen.

<sup>21</sup> Ijintayan zin ɔl o Joowo zaare o Yesu Kiristo dook. <sup>22</sup> Azaayun buk igeet ɔl o Joowo dook ŋaato, ricik ɔɔt ɔl o aliŋliŋonek alaan o Rom. <sup>23</sup> Nyamer deteni o Manyi Kiristo kaavu ŋaatunooŋ igeet dook.